

四庫全書

經部

欽定四庫全書

經部

周易淺述卷一

詳校官國子監祭酒臣覺羅吉善

通政使司副使臣莫瞻菴覆勘

總校官知縣臣繆琪

校對官編修臣盧遂

謄錄監生臣曹方昇

欽定四庫全書

經部一

周易淺述

易類

提要

臣等謹案周易淺述八卷

國朝陳夢雷撰夢雷字省齋閩縣人康熙庚戌
進士官翰林院編修緣事謫戍後蒙

恩召還校正銅板復緣事謫戍卒於戍所是編成
於康熙甲戌乃其初赴尚陽堡時所作大旨

以朱子本義為主而參以王弼注孔穎達疏
蘇軾傳胡廣大全來知德注諸家所未及及
所見與本義互異者則別抒己意以明之蓋
行篋乏書故所據止此其凡例稱解易數千
家未能廣覽道其實也然其說謂易之義蘊
不出理數象占顧數不可顯理不可窮故但
寄之於象知象則理數在其中而占亦可即
象而玩故所解以明象為主持論多切於人

事無一切言心言天支離幻冥之習其詮理
雖多尊朱子而不取其卦變之說取象雖兼
採來氏而不取其錯綜之論亦頗能掃除軼
輻惟卷末所附三十圖乃其友楊道聲所作
穿鑿煩碎實與夢雷書不相比附以原本所
載且說易原有此一家姑仍其舊存之置諸
不論不議可矣乾隆四十六年九月恭校上

總纂官

臣紀昀

臣陸錫熊

臣孫士毅

總校官

臣

陸費墀

周易淺述凡例

一易之為書義蘊雖多大抵理數象占四者盡之有是理乃有是數有是數即有是理六經皆言理獨易兼言數顧數不可顯理不可窮故但寄之于象夫子謂立象以盡意而全象六爻之傳皆稱象曰則理數之備于象可知故今所註釋多即其取象之由釋之蓋知象則理數在其中且可隨類旁通不拘于一隅之見不獨先儒精義有可融洽即時解所稱君臣政教亦

不妨借為設象之觀矣

一有象即有占本義分龍馬日月之辭為象吉凶悔吝之辭為占然占即在象中蓋龍馬日月之辭象也即占也吉凶悔吝之辭占也亦卦爻中有此象也繫辭傳謂居則觀其象而玩其辭動則觀其變而玩其占然必平日審于象既筮乃明于占蓋觀象貴能變通臨筮乃以我所問之事合之所占自能分其義類以定可否矣一是書雖參註疏大全及蘓氏來氏之解而要以本義

為主亦有本義所云大全中朱子又存疑義者則本
義尚有朱子未定之解自宜叅之他家以求其歸也
間有注疏大全所無妄附臆見者必明言與本義異
同之故非敢立異正以心有未安又不敢以已見托
之先儒故明言附一知半解以待高明指摘耳

一解易數千餘家未能廣覽來氏獨于取象最詳然一
卦之中內卦外卦二互卦六爻變卦變卦中互卦取
象已博若再以錯綜卦取象亦太泛矣愚意謂互變

猶未卦也錯綜則已屬意求之如震為龍乾亦言龍
正不必過拘也

一易之有圖原列于經首蓋卦畫在未有經之先也今
所附楊子道聲圖說則有先後天配合及方圓卦分
合之圖多後人之論矣不知圖者固不得經之原然
不讀全經亦未能究圖之蘊故附圖說于後使人先
從誦讀求其文義然後探其本原也

一是書義蘊本之先儒圖說本之楊子間皆附以臆見

獨于卦變有疑凡彖傳言卦變者程傳本義多異同
朱子亦多存疑義三覆再三究未得其不易之解今
凡彖傳言卦變者俱照來氏綜卦言之于理甚順故
闕卦變之圖以待異日

一易之為書雖理數象占所包者廣大旨無非扶陽而
抑陰隨時而守正教人遷善改過憂勤惕厲以終其
身學易者苟不悟此則詮理雖精探數雖微觀象雖
審決占雖神總于身心無當故所解多于前後總論

一卦大意及逐爻象傳之下發明聖人言外示人大
意雖未敢謂神明默成之道盡是然借一二言自啟
身心庶克道聽塗說之咎云

欽定四庫全書

周易淺述卷一

翰林院編修陳夢雷撰

昔者伏羲氏仰觀于天俯察于地近取諸身遠取諸物見天下萬有不齊之變不外由太極而生陰陽故畫一奇以象陽畫一偶以象陰而兩儀具見一陰一陽有各生一陰一陽之象故增二畫而太陽太陰少陽少陰之四象成疊之為三而三才既備則天地雷

風水火山澤之八卦列謂之卦者言懸卦物象以示
于人也八卦既成則八卦皆可為太極復生兩儀而
十六四象而三十二八卦而六十四而萬物之變盡
于斯矣伏羲雖有六十四卦之畫而未有文義至文
王始作彖辭以斷一卦之吉凶如乾之元亨利貞是
也周公始作爻辭以占所動之爻之吉凶如乾初九
之潛龍勿用九二之見龍在田利見大人者是也伏
羲六十四卦夏商相承用之皆有其書夏曰連山首

艮商曰歸藏首坤至文王周公則首乾連山歸藏不
傳今經則文王周公所作故曰周易也易之為字從
日從月陰陽具矣易之為義有二曰交易陰陽寒暑
上下四方之對待是也曰變易春夏秋冬循環往來
是也易分上下兩經上經首乾坤而終坎離下經首
咸恒而終既濟未濟意義所該者廣圖說亦發明其
略非以簡帙重大而分也孔子始作十翼上象一下
象二上象三下象四上繫五下繫六文言七說卦八

序卦九雜卦十周易上下二篇合孔子十翼凡十二篇後人以彖傳象傳文言分入諸卦而上下繫傳及說卦序卦雜卦則附于下經之後故曰易為四聖之書者此也



有天地而後萬物生焉萬物莫尊乎天周易所以首乾也其象為天其卦純陽健而不息故其象為天統言其象占則有大亨之道而利于正固就其理析言

之則四德具焉此全彖之大旨也卦既純陽變化不測故六爻皆取象于龍具龍德而在上則居天位以應天天子之事也具龍德而在下則盡天理以順天學者之事也生而知之安而行之潛見惕躍飛亢各隨其時者聖人也觀象玩辭觀變玩占固守其潛積學待見當惕而惕當躍而躍飛則應時亢不至悔者君子也此六爻之大旨也

乾元亨利貞

三畫皆陽其卦為乾其象為天乾者健而不息之謂
天體純陽健而無息以形體言為天以主宰言為帝
以性情言謂之乾下三畫內卦也上三畫外卦也六
畫皆陽內外皆乾乾之純健之至也元亨利貞文王
所繫之詞以斷一卦之吉凶所謂彖辭者也元大也
亨通也利宜也貞正而固也六奇純陽有元氣渾淪
無所不包而發生暢茂各得其宜皆歸于至正之象
學易者並得此卦而六爻不變則占當得大通而必

利在正固以保其終也 按大全謂諸家解元亨利
貞皆作四德獨本義作占辭然惟理如是則數亦如
是見于象占亦如是經言四德就其理析言之也本
義則就其象斷其占為體易者言之其意亦並行不
悖也

初九潛龍勿用

凡畫卦自下而上故下爻為初按本義大全凡揲筮
得三奇則所餘三十六策合四九之數為老陽得二

偶一奇則所餘二十八策合四七之數為少陽老變而少不變故陽爻稱九按來註引繫辭參天兩地而倚數謂參天者天之三位天一天三天五也兩地者地之二位地二地四也倚者依也天一依天三天三依天五而為九所以陽皆言九地二依地四而為六所以陰皆言六取生數不取成數此說亦可參用龍八十一鱗九九之數變化不測純陽之物故諸爻皆取象于龍初陽在下故有潛龍之象此時未可有為

故有勿用之象勿用雖戒占者之辭實卦爻中有此象也

九二見龍在田利見大人

二自下而上第二爻也後倣此出潛離隱故有見龍之象澤能及物猶田之得雨耕獲有功故有在田之象雖非君位而在下卦之中有君之德故有大人象澤能及物故有物所利見之象占者得此則利見此人若占者有見龍之德則可以得君行道利見九五

在上之大人矣

九三君子終日乾乾夕惕若厲无咎

九陽爻三陽位在下卦之上重剛而不中乃危地也
六爻取象三才則三為人位故不取象于龍而稱君
子處危地而以學問自修君子之事非可言龍也三
下乾終而上乾繼故其性體剛健有乾乾自惕之象
若者擬議之辭三居下卦之終故言終日夕亦日之
終也終日乾乾自始至終无日不戒懼也夕又惕若

自晝至夜无時不戒懼也重剛不中所處危地有厲
象雖處危地而剛健得正自修不息有雖危无咎之
象凡言无咎者本皆可致咎善處之故咎可无也程
傳擬舜之玄德升聞時解作相臣憂勤任重不必泥
九四或躍在淵无咎

九陽四陰在上卦之下或者疑而未定之辭進退之
際无適无莫无可不可人不能測故以或言之淵者
上空下洞深昧不測龍之所棲也淵雖卑于田然田

非龍所居在田則下于地淵正龍所從變化之處躍則已離于地而將向于天矣九陽動故有躍象四陰虛故有淵象以陽居陰居上之下又變巽為進退為不果有進退未定可上可下能隨時進退則可无咎之象乾至健知險六爻皆不言吉而險莫如三四故善處之僅可无咎而已程傳擬舜之歷試諸艱胡氏擬之儲貳皆存而不泥可也

九五飛龍在天利見大人

易卦皆以五為君位以其居上卦之中也上雖尊而過乎中則擬之賓師矣卦體純陽剛健也以陽居中中正也純陽居上之中而得正有飛龍在天之象居上之中人所共仰有利見大人象二與五皆剛健中正而五居尊位以聖人之德居天子之位故萬人樂得而見之即文言所謂聖人作而萬物覩也然使有德位者占此則所利見者九二在下之大人如堯之得舜可也

上九亢龍有悔

上者最上一爻之名亢者過于上而不能下龍由潛而見而躍而飛至秋分又蟄于淵知進退者也過此不蟄則亢矣五者位之極中正者得時之極過此則為亢矣陽極于上有龍之過亢而動必有悔之象唯聖人知進退存亡乃可免也凡言有者非必然之辭曰有悔亦自有元悔之道可知

用九見羣龍无首吉

九變而七不變凡筮得陽爻皆用九而獨乾稱用九蓋他卦不純陽獨乾之六爻皆變則純陽為陰所用皆九矣人為勢位所移為才氣所使是為九所用非能用九者因時變化无適无莫故獨稱用九坤之用六倣此六爻皆動有羣龍象陽皆變陰不以剛為物先剛而能柔有羣龍无首象龍未嘗无首而首不可見善藏其用者吉之道也六爻皆不言吉獨此言吉聖人不恃剛也如此

彖曰大哉乾元萬物資始乃統天

彖即文王所繫元亨利貞之辭彖曰以下謂之彖傳
孔子所以釋彖辭也彖獸名豕形而有六牙卦有六
爻彖則總六爻之義故以為名焉彖傳以天道明乾
義又析元亨利貞四德而言聖人之法天此一節首
釋元義也卦以陽為大陰為小六爻純陽故曰大哉
贊嘆之也元字兼大始二義大者無所不包物莫有
外者始者無所不達物莫有先者元之為德不可見

也可見者物之資始而已天以生物為心而物之生
必有所始乾元實能資之既資以始即資以終自始
而終終而復始皆一元生意貫徹其間是能統乎天
也資始者无物不有統天者无時不然此乾元之所
以大也

雲行雨施品物流形

此釋乾之亨也既資其始自然亨通元氣薰蒸油然
雲行淋漓布濩沛然雨施資始之初渾淪未辨故曰

萬物此則形質可別故曰品物流者川流不息形者明白不紊所謂亨也經未言亨字然雲行雨施氣之亨品物流形物之亨也

大明終始六位時成時乘六龍以御天

此言聖人體天之元亨也始即元終即貞不貞无以為元不終无以為始故曰終始來註以終為上爻始為初爻引繫辭原始要終亦可兼用蓋六爻即有元貞之義也大明之者深知其所以然之故也六位即

六爻潛見惕躍飛亢之位位隨其時皆有一定而不可易故曰時成成者位自成乘者聖人乘之既曰六位又言六龍者位有一定因時變化與之咸宜者聖人也故曰時乘六龍不曰行天道而曰御天者與時偕宜造化在我猶控御之也言聖人大明乾道之終始見卦之六位各以時成而能因時變化以合乎天則聖人即天矣六位已兼利貞而謂聖人之元亨者言其功業作用未及其究竟也

乾道變化各正性命保合太和乃利貞

此釋利貞之義也乾道即乾元之道變者化之漸化者變之成萬物由變而化也各正者不相混淆无偏枯也物所受為性天所賦為命保者存而不失合者聚而不散太和陰陽會合冲和之氣也各正者得于有生之初萬物各具一元也保合者全于有生之後萬物統會一元也乾道由變而化萬物華者向實生理各足無偏此利也太和元氣保全凝合又含將來

生意此貞也各正性命言理而氣在其中保合太和言氣而理在其中然皆元之所為此元之所以統天也

首出庶物萬國咸寧

此言聖人體天之利貞也首出庶物聰明睿智出乎庶物之上以君臨天下猶乾道之變化也乃恭己無為而四海各遂其生各復其性猶萬物之各正性命而保合太和也此聖人功業成就究竟故謂之利貞

又按古本大明終始節在利貞之下首出庶物之前
則聖人體天之元亨與體天之利貞不必分屬尤為
渾融大抵彖傳以乾備四德而要以元氣流行无間
發生萬物聖人備四德亦體元出治以致太平此聖
人得天位行天道致太平之占而占者得之亦隨其
所處時位論之不必拘也

象曰天行健君子以自强不息

書不盡言言不盡意故聖人立象以盡意卦之上下

兩象伏羲所取六爻之象周公所繫也此節謂之大象孔子作傳以釋伏羲所取之象也潛龍以下謂之小象孔子作傳以釋周公所取之象也上下卦有重義天則一而已但言天之行則今日一周明日又一周至健之象也以用也君子體易而用之常存天理不以人欲害其天德之剛則自強不息若間以一念之私則息矣凡大象之傳皆夫子所自取故與卦爻不相屬行健者在天之乾不息者在我之乾上句以

卦言下句以人事言他卦倣此

潛龍勿用陽在下也

自此至用九夫子小象之傳以釋周公取象之意也
陽謂九初爻在下陽氣在下君子處微未可以有為
也聖人于乾之初憂其在下于坤之初慮其始凝已
有扶陽抑陰之意

見龍在田德施普也

德即剛健中正之德二雖未得位而德化足以及物

所施普矣

終日乾乾反復道也

反復往來進退動止必合乎道也下乾已盡上乾復來乾而復乾无他塗轍猶云反反復復只在這條路也二德及于人三惟道修于己以所處危地也

或躍在淵進无咎也

量可而進適其時则无咎增一進字以斷其疑也

飛龍在天大人造也

造作也聖人興起在天子位也此釋飛龍在天至同聲相應節乃言利見大人

亢龍有悔盈不可久也

乾之上九陽之盈也盈則必消不可久致悔之由人知其不可久防于未亢之先則有悔者无悔矣防其亢者復返于潛而已

用九天德不可為首也

天德即乾道陽剛天德不可為物先羣龍无首用九

之象不可為首為人之用九者言也然惟其不可為首所以能首出庶物蓋乾本為萬物之所資始已具首出之德而物極必變善體乾者剛而能柔謙卑遜順不為天下先故曰不可為首非于乾有所不足也文言曰元者善之長也亨者嘉之會也利者義之和也貞者事之幹也

他卦彖象作傳而已獨乾坤為諸卦之父母故夫子更設文言以盡二卦之蘊依文以言其理故曰文言

又為有文之言詞也此乃釋元亨利貞為四德者字也字夫子悠然有會于其妙而贊嘆之非詮解之詞元者生物之始天地之德渾涵于此於時為春於人為仁四時之運皆此元氣周流義禮智之善皆從此生生惻怛之心發端故曰善之長也亨者生物之通物至于此莫不嘉美於時為夏於人為禮萬物至夏發生暢茂一物如此萬物無不如此衆美之物無不會聚故曰嘉之會也利者生物之遂物各得宜不相

妨害於時為秋於人為義秋氣嚴肅義也然無此氣不能各遂其生人人親其親長其長義也即此便和所以為利若不親其親而親他人之親至於不和又安有利不於利上求利義之和處便是利益處置得宜不逆于物利莫大焉者也貞者生物之成實理具備隨在各足於時為冬於人為智萬物至冬收斂完固實理充足故貞下起元來歲復能發生人之有知見理既明知而弗去靈明內涵萬變由我猶木之有

幹枝葉從此以生也此節發明乾之四德天理之自然也下節乃言君子體乾之學人事之當然也

君子體仁足以長人嘉會足以合禮利物足以和義貞固足以幹事

體仁以身法天地生物之心所存所發无不在是全體皆仁无一物不在所愛有君長之道故足以長人嘉會本義曰嘉其所會謂衆美畢集動容周旋無不盡善不失之過不失之不及故曰合禮義體嚴而用

和君子使天下君君臣臣父父子子各得所利情既相安分乃不瀆故義無不和貞固者真知理之正而固守之凡事從此立矣故曰足以幹事

君子行此四德者故曰乾元亨利貞

天行健而四德備君子亦體天之健以行四德君子之乾也四德人所同具唯君子能自强不息以法乎乾乃能行之故言元亨利貞必先以乾也自元者善之長至此皆以申明彖傳之意然下文申明彖傳皆

繫以子曰此則否者疑古人已有其辭故左傳穆姜嘗稱引之夫子亦有取焉者也

初九曰潛龍勿用何謂也子曰龍德而隱者也不易乎世不成乎名遯世无悶不見是而无悶樂則行之憂則違之確乎其不可拔潛龍也

自此至乃見天則夫子申言彖傳之意而此節六爻設為問答之辭龍德聖人之德也聖人神明不測故曰龍德初九陽在下聖人之在側陋也不易乎世謂

自守其道不因世而變易不成乎名謂自晦其跡不求其名之成行與世違遜世矣而道足自樂故无悶已不求名不見是于人矣而心可自信故无悶時當可樂則不私其有以同乎人時當可憂則不失吾已違而去之憂與悶不同為一身起見為悶為天下起見為憂此六句皆言龍德確乎其不可拔隱也然確乃的確之確非堅確之確蓋非意專于退也憂樂一随乎時行違一準乎道非一己之私所謂用舍無與

子已行藏安于所遇富貴不淫貧賤不移所見真確者也六爻皆以聖人言之有隱顯而无淺深

九二曰見龍在田利見大人何謂也子曰龍德而正中者也庸言之信庸行之謹閑邪存其誠善世而不伐德博而化易曰見龍在田利見大人君德也

正中正當下卦之中也蓋上下卦以二五為中也德而曰龍似神奇不可測矣不知聖人祇修其庸言庸行而已庸常之言亦信庸常之行亦謹則無不信與

謹盛德之至矣猶且閑邪存誠猶詩所謂無斁亦保
雖無厭斁而常自保守也邪自外入故言閑誠本我
有故言存邪閑則誠自存蓋妄去則真全非別求所
謂誠者而存之也乾二畫實故言誠坤二畫虛故言
敬誠敬者聖學之源見于乾卦坤卦實天地自然之
理也去其不謹信之邪存其謹信之誠由是上可格
君下可善俗則善不徒在一身而及于一世矣不見
為己之善而見為世之善何伐之有乎善被于一世

德之博也已既不伐人亦不知其所以然正己而物
正化也自誠之純粹言之曰善自其及人者言之曰
德二非五未居君之位而正中已有君之德故稱大
人也

九三曰君子終日乾乾夕惕若厲无咎何謂也子曰君
子進德修業忠信所以進德也修辭立其誠所以居業
也知至至之可與幾也知終終之可與存義也是故居
上位而不驕在下位而不憂故乾乾因其時而惕雖危

无咎矣

本義謂六爻皆以聖人言之有隱顯而无淺深言所處時位有不同非自初而上有積漸也三爻爻辭稱君子亦君子而求至于聖人者也進德就存諸心言修業就見諸事言忠信存諸心者无一念之不誠也德欲進而不已然使无真實之心德安能進故忠信所以進德也修辭立其誠見于事者无一言之不實也人之不實多在于言若口不擇言雖有忠信之心

不能立立其誠即立此忠信隨事檢點不敢妄言雖
不言制行而制行在其中矣業既言修又言居者修
者治而弗怠居者守而勿失如屋之既修居之乃為
我有也修辭立誠業為我有故曰所以居業也忠信
修辭言所以進德修業之道知至知終又詳其始終
用功之序知至至之進德之事理无加于忠信故曰
至至之則進而不已也誠偽微茫之判曰幾與許也
人惟所見未真故不敢進疑似之際不能自主知至

則實見是非端的知德之極至在是而以實心必欲
赴之則凡意念所動微茫之際不差此幾之動乃可
許之而德日進矣知終終之居業之事萬事究竟歸
于一誠故為終終之則居而不失也事物有裁制之
宜為義義與幾非二在心之初動為幾然幾尚有善
惡所動皆善見之于事則為義矣存之即居之也人
不知究竟所在則不知所終知之而不務至乎其極
雖所行偶有合宜亦不能存知終則深知萬事歸於

一誠而以修辭立誠終之則凡事之裁制合宜而為義者皆无不存而業自修矣知開其始行要其終內實其心外實其事以此居上居下安往不宜所以終日乾乾夕猶惕若无一息之間也三在內卦為上合外卦為下不驕不憂所謂无咎進德修業之效也

九四曰或躍在淵无咎何謂也子曰上下无常非為邪也進退无恒非離羣也君子進德修業欲及時也故无咎

或之為言可上可下可進可退上下无常疑為邪矣
然欲及時而上故有時或下非為邪枉也進退无恒
疑于離羣矣然欲及時而進故有時或退非離羣類
也四處危疑之地進德修業與九三同三因時四欲
及時无常乃所以為常无恒乃所以為恒故无咎也
九五曰飛龍在天利見大人何謂也子曰同聲相應同
氣相求水流濕火就燥雲從龍風從虎聖人作而萬物
覩本乎天者親上本乎地者親下則各從其類也

此言凡物各從其類聖人人類之首故為人所歸以
釋利見之義也鶴鳴子和雄鳴雌應同聲相應也取
火於日取水於月同氣相求也下濕易潤水先趨之
乾燥易焚火先燃之龍陽物薰蒸之氣為雲虎陰物
肅殺之氣為風凡此皆以類相感者也聖人人類之
首故為人之利見亦然作者首出于上觀者下觀而
化也又以物之親上親下以見人之于聖人亦然本
乎天日月星辰輕清成象者皆親之本乎地蟲獸草

木重濁成形者皆親之蓋屬陽者從上屬陰者從下也類各有本本各有親聖人萬物一體利見又何疑乎

上九曰亢龍有悔何謂也子曰貴而无位高而无民賢人在下位而无輔是以動而有悔也

九為龍貴矣而陽不得陽位位在于五是无位也上而亢高矣而純陽无陰是无民也九三之賢在下而敵體不應是无輔是以動而有悔然致悔在動不動

而復于潛則悔可无矣

潛龍勿用下也

陽在下也釋潛龍以氣言此釋勿用以人言言在下未可用也

見龍在田時舍也

舍作舍止之舍見止在田尚未大用時舍者暫止于此勢非久安也

終日乾乾行事也

進德修業行所當行也即行健不息之意

或躍在淵自試也

自試斟酌之意試其時之可否而不輕進非中無所主而漫以嘗試也

飛龍在天上治也

得位而行居上以治下也

亢龍有悔窮之災也

陰陽一氣无窮而時位有窮窮極則災生也

乾元用九天下治也

言乾元用九見與他卦不同蓋一百九十二陽爻皆用九各有所指獨乾之用九為剛而能柔人君治天下之道也元者仁也足以長人者也人君體乾之元用乾之九至誠惻怛之意行于剛果之中寬猛得宜天下自无不治矣四德獨言元元可包四德也亢之後言元貞下起元也天下自无不治一元之運无為之化也自潛龍勿用下也至此申言象傳之意

潛龍勿用陽氣潛藏

陽氣潛藏君子亦當晦隱初一潛而天下陽之屬皆
宜潛也曰下曰隱曰藏反復發明示人不必強立分
別

見龍在田天下文明

文者經緯成章明者光顯不昧二雖不在上位天下
已被文明之化如孔子是也此爻變離有文明象
終日乾乾與時偕行

兼无時不然隨時加謹二意天行健无息時與天時俱不息法天之學也時當危厲理宜乾惕處危之道也

或躍在淵乾道乃革

離下内卦而上外卦時當變革勢不得輕

飛龍在天乃位乎天德

六爻皆天德而五乃天位天德之得位者唯有是德乃宜居是位也

亢龍有悔與時偕極

此窮極之極非至極之謂也時既極而我不能變通則與時運俱極故言偕偕極有悔非德也故初曰德之隱二曰正中三四曰進德五曰天德獨上不言德知進退存亡之聖人則雖偕極而有窮變通久之道矣

乾元用九乃見天則

則者理之有節限而无過不及者也剛柔適中天之

則也用九剛而能柔乃合乎天之則也言用九而冠以乾元有統天之德而後九可用也自潛龍勿用下也至此皆反復申言象傳之意或言其時或言其位或言其用不必強有所分

乾元者始而亨者也

自此至天下平也又申彖傳之意承上言乾元用九又嘆乾元之妙前以元亨利貞析為四德至此又若以元亨與利貞分言之而統歸于一元因贊乾德之

妙唯聖人能體元以法天也他解有謂自此至天下
平申言乾元用九天下治者非蓋用九六爻皆變取
其剛而能柔此言剛健中正六爻發揮則以純乾之
德言之蓋夫子因言乾元因申彖傳未盡之意也始
即資始之始而始則必亨蓋有息則不能亨不息則
理勢必亨增而字有漸次而无斷續天地生生之氣
自微而著始而亨則亨而利利而貞皆可知矣

利貞者性情也

收斂歸藏乃見性情之實元亨時乾之發見利貞則各有成就如草木之種春時發芽夏則千枝萬葉至秋漸收斂冬乃堅實前此發見時共一性情至此則各一性情猶前言各正性命也邇性之本言之則曰性命推性之用言之則曰性情情又可發生貞下又起元矣

乾始能以美利利天下不言所利大矣哉

乾始乾元之始也乾始之道能使庶類生成天下蒙

其美利能以美利利天下也坤利牝馬他卦利建侯
涉川皆有所指乾始无所不利非可指名故言利不
言所利也乾之始即元而亨不言亨者元可包亨也
利天下者利不言所利者貞不言貞者利可包貞也
然乾始能以之則亨利貞皆在元之中矣故贊其大
大哉乾乎剛健中正純粹精也

四德一元元一乾也故曰大哉乾乎其體堅強不可
屈撓剛也其用循環无少間斷健也其行若有所限

而无過不及中也其立若有所專而不偏不倚正也
剛健之極不雜于陰柔純也中正之極不入于邪惡
粹也純粹至于至極无有形容精也乾屬剛而又言
中正者蓋分乾坤而言則有陰陽剛柔動靜之不同
自一元之氣周流无間之本體言之則无所不包也
六爻發揮旁通情也

乾德之精不容言矣可言者其情耳故聖人以六爻
發揮曲盡其情而乾之道在易矣

時乘六龍以御天也雲行雨施天下平也

六爻曲盡易之道而唯九五有德位之大人能體備
乎乾之蘊故獨以有天下之聖人言之六龍即六爻
時乘句增也字與上不同上重乘龍此重御天言乘
龍者將以御天也六爻不外一時聖人以時乘此六
龍將以御天下也雲行雨施就聖人言之政教如雲
之行德澤如雨之施天下自无不平也御天而雲行
雨施聖人之以美利利天下也天下皆平聖人之不

言所利也至此而乾之道在聖人矣又按彖以元亨利貞言乾文言即以元亨利貞屬之君子乾之德在君子躬行之中也彖以雲行雨施言乾文言即以屬之聖人乾之功即在聖人運用之內也此天人之合君子自强不息以法乎天不可以已也

君子以成德為行日可見之行也潛之為言也隱而未見行而未成是以君子弗用也

德得于心者也行見于事者也日可見猶指日可待

之意理得于心可以見之行事矣但當隱而未見之時德雖可行而時位未能成其所行君子知其時位之未可是以弗用此以下又申象傳未盡之意

君子學以聚之問以辨之寬以居之仁以行之易曰見龍在田利見大人君德也

九二有正中之龍德然所以成德者亦由學問之功之指正中之理言理之得于天者雖我所固有然散見于事物不學則聞見者寡無以聚于吾心也聚矣

而不問則不知所擇故問所以辨其是非同異也聚
矣辨矣狹隘其心則此理非我有故必有涵養寬裕
之意優游厭飫勿怠勿助而所聚所辨者庶融會貫
通與心為一矣至于仁者吾心之全德即天之元吾
之所學所問者此也既聚既辨之後既居于心即見
之于行事亦猶天之行健无或一息之間則莫非天
理无一毫私欲之間而乾元之德全雖未居君之位
而已具君之德矣

九三重剛而不中上不在天下不在田故乾乾因其時而惕雖危无咎矣

重剛陽爻陽位也按來註三居下卦之上四居上卦之下以剛接剛故皆曰重此解亦可參不中非二五也不在天非上之中不在田非下之中時本可危因時而惕以防危故雖危无咎

九四重剛而不中上不在天下不在田中不在人故或之或之者疑之也故无咎

重字衍三四皆人位而四居人之上而近君故曰不在人重剛不中之中二五之中也中不在人之中六爻中間之中也下以二為中三則過上以五為中四則不及過則憂不及則疑然憂所當憂卒于无憂疑所當疑卒于无疑故皆可以无咎

夫大人者與天地合其德與日月合其明與四時合其序與鬼神合其吉凶先天而天弗違後天而奉天時天且弗違而況于人乎況于鬼神乎

前同聲相應節言利見之意此專就大人言而利見之意在其中九五之為大人也以道也天地者道之原大人无私以道為體則合于天地易簡之德矣天地之有象而照臨者為日月循序而運行者為四時屈伸往來生成萬物者為鬼神名雖殊道則一也大人既與天地合德故其明目達聰合乎日月之照臨刑賞慘舒合乎四時之代禪遏揚彰瘡合乎鬼神之福善禍淫先天弗違如先王未有之禮可以義起蓋

雖天之所未有而吾意默與道契雖天不能違也後
天奉時如天秩天序天理所有吾奉而行之耳蓋人
與天地鬼神本无二理特蔽于有我之私而不能相
通大人與道為一即與天為一原无彼此先後之可
言其曰先天後天者亦極言或先或後皆與天合也
亢之為言也知進而不知退知存而不知亡知得而不
知喪

進退以身言窮上反下退矣存亡以位言過五居上

亡矣得喪以物言无輔无民喪矣是之謂亢所以動而有悔

其唯聖人乎知進退存亡而不失其正者其唯聖人乎知進退存亡則无得喪矣故不復言得喪不失其正處之以道非計私以避害也正即貞也乾元歸于一貞聖人法天體元歸于一正隨其時不失其正非聖人不能也故再言其唯聖人乎此卦六爻周公皆取象于龍夫子文言皆屬之于聖非聖人固不能體天

然易非專為聖人言也自天子以至于庶人自聖賢以至于愚不肖皆可觀象玩辭觀變玩占而以聖人為法耳蓋人生天地之間吉凶悔吝无一息之停聖人隨其時之所值而皆有以處之使得其正此不獨乾卦之義而實全易之義易之所以開物成務聖人所以為天下後世法者此也



歸藏首坤其義未知所取周易以坤繼乾以地承天

萬物之父母也全卦以柔順得正為地道臣道妻道之宜六爻唯二五言吉利而五不如二之正他則皆有扶陽抑陰之微旨焉坤卦之大略也

坤元亨利牝馬之貞君子有攸往先迷後得主利西南得朋東北喪朋安貞吉

三偶為陰其卦為坤其象為地陰之成形莫大乎地地勢卑順故名為坤六畫皆陰內外皆坤陰之純順之至也純陰至順一承乎陽循物无違居心順應理

无不通故占亦可大亨然必守此順德久而不變故
曰利牝馬之貞牝馬柔順而健行者馬為乾象曰牝
馬明配乾也陽得其全陰得其半以柔順得正為利
則其他有所不利矣陽先陰後君子占此欲有所往
率先首事必至于迷居後順從乃得其當故曰先迷
後得主利本義謂陽主義而陰主利大全謂占此卦
便主利此事非坤道主利萬物也時解皆從之今按
蘇傳來註皆以後得主為句謂陽為陰主乾為坤主

居後從乾得其所主所以為利也此雖與本義不合然觀後文言後得主而有常句似非遺去利字且于理義甚順宜存之西南陰方東北陽方西南致養之地與坤同道故得朋東北反乎西南故喪朋陰體柔而躁妄作以求全則非矣必安于正乃吉故曰安貞吉蓋陰之德減于陽之半故體乾之君子可先亦可後而體坤之君子但為後不可為先所遇雖得喪之不同而要以安于正則吉此地道臣道妻道也此三

句本義解如此時解皆從之今按蘇傳及來註皆謂
文王圖圖西南兌離巽三女所居坤之朋也東北震
坎艮三男所居非朋也陰以從陽為正去其三女之
朋求主于東北則為安貞之吉矣此雖與本義悖而
說可存

彖曰至哉坤元萬物資生乃順承天

此以地道明坤之義而首言元也至極也乾曰大无
所不包也坤曰至无所不盡也乾之大无方坤則未

離乎方也故但曰至元非別有一元乾施坤受一氣而已資始者有其氣資生則有其形然非坤自為順天氣而承之以生不先不後所以為至也

坤厚載物德合元疆含弘光大品物咸亨

此言亨也坤之德厚持載萬物合于乾之元疆元疆即乾之不息也不息則可久元疆則可大矣其靜也翕故曰含弘含言无所不容弘言无所不有其動也闢故曰光大光言无所不著大言无所不被所以德

合无疆而品物之流形者咸暢茂條達无不亨矣
牝馬地類行地无疆柔順利貞君子攸行

此言利貞也馬乾象而曰地類者馬行地之物牝則
陰之類也行地无疆則順而健矣地承天施柔順也
生物有終利貞也坤之德如此君子所行如之則有
先迷後得之慶矣

先迷失道後順得常西南得朋乃與類行東北喪朋乃
終有慶

居先則迷惑而失坤之道居後則順利而得地之常
西南與陰之類行故得朋東北非其類故喪朋然反
而與類行亦終有得朋之慶矣本義所解如此程傳
謂東北從陽成生物之功曰有慶蘇傳來註同之今
按獨陰不生從陽有慶為是

安貞之吉應地无疆

安而且貞地之德也彖有三无疆德合无疆坤配乾
之无疆行地无疆坤之德无疆也應地无疆人法地

之无疆也无疆本天德唯地能合天之无疆則地亦无疆君子能法地之无疆君子亦无疆君子法地地法天一天德之无疆已矣

象曰地勢坤君子以厚德載物

天以氣運故曰行地以形載故曰勢上下卦皆地然其象一而已故不言重而但言其勢之順蓋地非以平為順高下相因正見其順也高下相因无窮地勢之順以地德之厚也厚故萬物皆載焉君子以之法

地德之厚而民物皆在所載矣至乾之大象不言乾而言健地則不言順而言坤朱子謂用字偶有不同不必穿鑿

初六履霜堅冰至

陰爻言六者凡揲筮得三偶則所餘二十四策合四六之數為老陰得二奇一偶則所餘三十二策合四八之數為少陰老變而少不變故陰爻稱六又按兩地之義合河圖地二地四而為六取地之生數不取

成數則亦為六也霜一陰之象冰六陰之象霜陰氣所結其勢猶微及其既盛則水凍而為冰初陰有霜象六陰有冰象陰爻雖始生于下其端甚微而其勢必盛故聖人示人以戒辭當履霜則知堅冰之將至也蓋陰陽造化之本不能相無而消長有常亦非人所能損益然其類則陽生陰殺陽善陰惡陽君子而陰小人故聖人于易每致扶陽抑陰之旨亦參贊天地之微權也

象曰履霜堅冰陰始凝也馴致其道至堅冰也

本義謂魏志作初六履霜當從之馴順習也道即小人道長之道經言堅冰至要其終也象傳至堅冰原其始也當其履霜不過陰之始凝耳乃至堅冰則惟其因循順習以致之耳戒占者當豫防不可自我致之也始于微而終于著陰陽均也而陰之為物弱而易入易以陷人故戒其馴習而致之即子產水弱民玩之意

六二直方大不習无不利

乾五爻皆取象獨九三指其性體剛健者言之坤五爻皆取象獨六二指其性體柔順者言之初三五柔順而不正非陰位也四上柔順而不中非上下卦之中也唯六二柔順而中正得坤道之純者也正則无私曲而内直中则无偏黨而外方内直外方其德自然盛大不假修習而自无不利也不揉而直不矩而方不廓而大故曰不習不待學習自然直方大故曰

无不利蓋習而利則利止于所習矣唯不習故无不利言以乾之德為德也乾其動也直坤亦直乾圓而坤則方乾不息而坤德合无疆則與乾並大矣占者有是德則其占如是初六占在象中此則象在占中象曰六二之動直以方也不習无不利地道光也

地之直方于其動觀之即生物之无屈撓見其直即賦形之无變易見其方蓋唯承天而動故也直方則大也故不言大地道之光自然而然无所勉強不可

揜蔽也

六三含章可貞或從王事无成有終

坤為吝嗇又為文六三陰居陽位剛柔相雜内含章
美之象體純陰可貞以守之象居下卦之上有位者
也有或出而從王事不終含藏之象三居下卦之終
有終之象三居陽不正故不曰貞曰可貞不欲輕進
故曰或不敢造始故曰從人臣之道凡事不敢居其
成功唯奉事以守終故曰无成有終也本義謂始雖

无成後必有終意似不同然全卦有先迷後得之象而三爻多凶凡占者得此即如所占可也

象曰含章可貞以時發也或從王事知光大也

處下之道必能含其美乃為得正然義所當為則以時而發非有所隱而不盡也或從王事乃能无成有終以其知之光大故也蓋天下唯能含者乃能發圭角淺露不可有為矣唯知光大者乃能含暗昧不明妄自炫燿矣大知光明者不事匿名晦迹而驕矜不

形涵養深沉者不用見事風生而事業自遠此即象傳所謂合弘光大也

六四括囊无咎无譽

陰虛能受故坤有囊象重陰凝閉有括囊之象三以陰居陽猶或可出四以陰居陰逼近于君唯有謹密晦藏而已不但言語之簡默凡一切動止皆然如此則无僨事之咎亦无成事之譽蓋四近君譽則逼上譽即咎之招无咎者以无譽也求譽則不能括囊矣

象曰括囊无咎慎不害也

能慎則不害也君子當否塞之時不求有功當思遠害

六五黃裳元吉

黃中色地之色也裳下飾坤為裳也然不于二言之獨于五言之者蓋六二陰而在下柔順中正自然无不利六五以陰居尊必中順之德充于內而見于外乃得大善之吉否則凶矣程傳以羿莽武氏臣妾居

尊位者言之先儒或病其拘葢卦本臣道妻道而五居尊位然易之為占皆因人立教為臣妾者得此則宜忠信卑順以盡其道為君得此則宜居中謙遜以下賢也

象曰黃裳元吉文在中也

坤為文又居五之中文生于相錯陰陽專一則元文陰有陽德則黃中之文充于中而見諸外也

上六龍戰于野其血玄黃

陰宜從陽者也純陰在上盛于陽矣故與陽皆有龍象盛則必爭故有戰象上動不已進至于外故有戰于野之象陰雖極盛豈能獨傷陽哉故有兩敗俱傷之象氣陽血陰陽衰于陰故與陰皆有血象象如此不言凶而凶可知矣乾上但言亢而坤則言戰者蓋陰陽雖不可相無然乾尊則无對待坤卑而盛極必至侵傷也初曰堅冰至者防龍戰之禍于始上曰龍戰野則著堅冰之禍于終也餘意文言詳之

象曰龍戰于野其道窮也

陰盛窮極勢必爭而傷也然道豈驟窮由初之馴致也

用六利永貞

坤之用六以凡筮得陰爻六變而八不變也然凡陰爻皆用六獨坤以純陰而皆變為陽則得稱用六也陰柔不能固守變而為陽則能永貞矣不牽于私欲不惑于常變固守其順所以利也坤本有元亨此獨

言永貞者蓋乾以元資始坤以貞大終六爻皆變則其德減半故不言元亨也前言安貞之德而此言永貞者蓋安者順而不動永者健而不息變而為乾故言永也乾吉在于元首坤利在于永貞蓋以剛健居人之首則物之所不與也以柔順而為不正則佞邪之道也乾變坤剛而能柔坤變乾雖柔必強變化氣質之道陽本先于陰而陽之極不為首陰本小于陽而陰之極以大終審時觀變之學也

象曰用六永貞以大終也

陰小陽大先陰而後陽始小而終大也小者小人之
道大者君子之道美其善變也

文言曰坤至柔而動也剛至靜而德方

此釋牝馬之貞也動者生物所動之機德者生物所
得之質坤不專成本至柔也而承天發生勃不可禦
動之剛也坤不造始本至靜也而生物賦形一定不
易德之方也乾剛健而中正所以為大坤柔靜中有

剛方所以為至不必于柔靜之外別求剛方也

後得主而有常

按本義主下當有利字即彖傳後順得常之意今按蘇來二說後乎乾得乾為之主坤道之常也觀其文勢主下无利字為是

含萬物而化光

復明亨義即彖傳含弘光大之意靜翕則含生意於中動闢則有光輝也

坤道其順乎承天而時行

承天之健順天之時以行即彖傳順承天之意自坤至柔至此皆以申言彖傳之意

積善之家必有餘慶積不善之家必有餘殃臣弑其君子弑其父非一朝一夕之故其所由來者漸矣由辨之不早辨也易曰履霜堅冰至蓋言順也

順本義作慎凡事皆由積漸所致宜辨之于微而加慎也或曰順即馴即馴致其道言因循以致之也更

通

直其正也方其義也君子敬以直內義以方外敬義立而德不孤直方大不習无不利則不疑其所行也

何以謂直言其心之本體无邪正也何以謂方言其心之妙用合宜義也此六二直方之所由名也下則言求直方之功君子惟主敬則其內自直兢兢業業主一无適一私不擾直矣惟守義則其外自方凡所施行因時制宜一定不易方矣敬義既立事君則忠

事親則悅交友則順所謂不孤至此不期大而自大
矣蘇氏謂直內方外隱然如碩師良友之在吾側是
以特立而不孤也此說較勝凡事必有所疑故習而
後利體全用備如此无施不可坦然行之而无疑復
何假于習乎乾于二言誠坤于二言敬乾于二言仁
坤于二言義先儒以誠敬屬乾坤仁義分陰陽蓋本
于此

陰雖有美含之以從王事弗敢成也地道也妻道也臣

道也地道无成而代有終也

三以陰居陽雖有美而含之非其才有所不足分有所不敢也以從王事不敢專其成功蓋以地承天即以妻承夫以臣從君之道也地道不敢專成功不過代天而終所未終况妻道臣道乎以數言之天數終于九亦以地十終之

天地變化草木蕃天地閉賢人隱易曰括囊无咎无譽蓋言謹也

天地二句引起下文之辭天地交感則變化萬物雖草木亦蕃若重陰閉塞雖賢人亦隱初言慎毋縱夫微陰之長也四言謹毋銜于重陰之時也

君子黃中通理

此釋黃字之義中德在內曲鬯旁通无私欲之滯塞條理分明无私欲之混淆中德在內不可見即通理二字形容其蘊所謂文在中也本文既變坎為通通之象本文未變坤為文理之象

正位居體

此釋裳字之義雖在尊位而居下體

美在其中而暢于四支發于事業美之至也

德之美者既在其中由是暢于四支而和順在一身
發于事業而順治者在天下內外融貫乃為美之至
此贊嘆之以見元吉之故

陰疑于陽必戰為其嫌于无陽也故稱龍焉猶未離其
類也故稱血焉夫玄黃者天地之雜也天玄而地黃

三雖有美含之猶知有陽也上則均敵无小大之差
疑于陽矣其勢必戰十月純陰古人稱曰陽月亦以
天道不可一日无陽故稱龍于盛陰之時以存陽也
氣陽血陰未離乎陰故曰類玄黃天地之正色言陰
陽皆傷也全卦唯二五居中為坤德之美二居中得
正故不習而利五以柔中居尊必中順而吉三以陰
居陽貴乎含四以陰居陰在乎括初勢猶微宜辨于
始上勢已極必凶于終矣蓋陰陽二氣天地不能相

无而因時有扶陽抑陰之妙又聖人裁成輔相之功
所以參贊天地者也



屯卦震下坎上震一陽動于二陰之下故其德為動
其象為雷坎一陽陷于二陰之間故其德為陷為險
其象為雲為雨為水有天地而後萬物生焉屯者難
也物之始生鬱結未通故其為字象草穿地始出未
申此屯所以次乾坤之後也其卦以震遇坎乾坤始

交而遇坎陷故名爲屯也六爻二陽四陰凡卦爻
中陰陽以少者爲主故二陽爲四陰之主然五坎體
陷而失勢初震體動而得時屯難之世陽剛善下可
以有爲故初爲全卦之主也五但小貞吉而已餘四
爻皆因初起義四應初則往吉三不應初則往吝二
乘初則不進上遠初則道窮此全卦六爻之大略也
屯元亨利貞勿用有攸往利建侯

乾坤始交而遇險陷世界草昧之時震動在下坎險

在上在險中有震動之才可以大亨但出險有機利
于守正未可妄進震性好動故戒以勿輕往也三四
五互為艮止勿用攸往之象震一君二民又為長子
震驚百里有侯象初九陽居陰下為成卦之主是以
賢下人得民而可君故利于建侯筮立君者遇之則吉
也蓋盈天地之間者萬物萬物以人為首人道以君
為尊草昧之時震動出險立君得正乃以繼天立極
此屯所以具四德而繼乾坤也

彖曰屯剛柔始交而難生

乾坤之後一索得震為始交再索得坎為難生此正昏冥雜亂之時此以二體釋屯之名義也

動乎險中大亨貞

動乎險中未遽出險震體能動故可大亨坎在險中故宜正自此以下釋元亨利貞皆不言四德用文王本意此以二體之德釋卦辭也

雷雨之動滿盈天造草昧宜建侯而不寧

此以二體之象釋卦辭也雷震象雨坎象物之生未
有不待雷雨者然必霽而後見其功當其方動充滿
瀆亂不知所從則氣運鬱塞之時也孔子即此以言
世道言此乃天造之草昧草者如草不齊震為蕃草
之象昧者如天未明坎為月天尚未明又坎水外暗
內明亦昧之象此時天使之然如天所造天下未定
名分未明雜亂晦冥之際宜立君以統治之然君初
立治理猶踈日夜不遑寧處乃可成撥亂反正之功

如更始既立日夜縱情聲色非不寧者矣蓋惟侯心
不寧方可求天下之寧也自屯卦以下彖傳皆先釋
卦之名義後釋卦辭而釋卦辭又各有所取或卦體
或卦象或卦德或卦變而彖之旨盡矣此皆先儒所
未及說似拘而分疏清析不可易也

彖曰雲雷屯君子以經綸

坎不言水而言雲者在雷之上鬱而未通雨而未成
也坎在震下則為雷雨之解矣彖言雷雨象言雲雷

彖言其動象著其體也經綸治絲之事君子治世猶
治亂絲解其紛結經者理其緒而分之猶雷自斂而
發綸者比其類而合之猶雲自散而聚屯難之世人
皆惶懼沮喪不知正君子經綸之時也

初九磐桓利居貞利建侯

磐桓難進之貌陽剛動體才足濟屯但初在下元勢
應四柔无援當險陷之交故有磐桓之象然陽居陽
位為得正故利于居貞又初成卦之主以陽下陰為

民所歸有君之象故占者如是則利建以為侯此爻
為卦之主大意與彖同磐桓即勿用有攸往利居貞
即利貞利建侯雖同而合全卦言之則侯指人自初
爻言之則侯指已占者得之則隨所處以為占不必
泥也

象曰雖磐桓志行正也以貴下賤大得民也

磐桓非晏安棄務志在行正也正為濟屯之本居之
將以行之也陽貴陰賤初爻陽在陰下屯難之世人

皆思主貴能為賤下所以大得民心可以為君也

六二屯如遭如乘馬班如匪寇婚媾女子貞不字十年
乃字

屯如以時言鬱塞而未通也遭如以遇屯之時者言
遲回而未進也班分布不進之貌震于馬為鼻足為
作足班如之象女子許嫁笄而字六二變兌為少女
女子之象三四互為艮止不字之象二三四互為
坤坤數十十年之象六二陰柔中正上應于五然以

乘初之剛故為所難而遄回不進然初非為寇也乃求與已為婚媾耳但二與五為正應二貞于五異于五者皆寇矣焉知其德哉故守正而不之許至于十年則妄求者去正應者合數窮理極而可許故不字于初終字于五也爻象如此占者得之則宜如是蓋全卦雖以屯初為主而各爻又各以所處之位論其吉凶唯二乘初剛故為所難二之質柔故受人所制欲應五不得故屯遄不字所應者正故終有可字之

時也易爻有已正而他爻視之為邪者有已凶而他爻得之為吉者屯之初正也而二視之則為寇旅之上凶也而五承之則有譽命蓋皆以所處之時位論之不可泥也

象曰六二之難乘剛也十年乃字反常也

乘剛居初之上為初所迫失其常也然理之所在十年必反守正不變不悖常矣終獲正應復其常也六三即鹿无虞惟入于林中君子幾不如舍往吝

六三下卦六陰而居三之陽位以求上六不安于陰而又貪求陽不中不正无正應而妄行取困者也鹿陽物虞虞人无虞无應也陽在五而不在上求陽不獲即鹿无虞之象林陰象在六二六四之間入于林中象卦下體震動也互體有艮止也聖人于其震之動庶幾其艮之止曰君子見幾不如舍去若往逐不舍必致羞吝矣

象曰即鹿无虞以從禽也君子舍之往吝窮也

妄動由于多欲无虞而即鹿以有貪禽之心君子見
幾則必舍若往則羞吝而至困窮矣經曰不如舍辨
之明也傳曰舍之去之決也

六四乘馬班如求婚媾往吉无不利

坎為下首薄蹄之馬陰柔居屯不能上進故有乘馬
班如之象然初九守正于下以應于已故初來求四
四往應之則吉也本義謂下求婚媾蓋以初求四為
以陽求陰往者適人之意也時解以四近五為大臣

初剛為賢四求賢輔君乃以濟屯然以陰求陽有害
婚媾之義且初為卦主有可君之德如湯之于伊尹
昭烈之于孔明皆以君下臣以求濟屯然後往而應
之正不必復言輔五又剛柔相濟亦以濟屯亦不必
專以剛為濟屯之賢也

象曰求而往明也

初來求我而後往應非明理知幾者不能觀象傳意
更與本義合

六五屯其膏小貞吉大貞凶

九五雖以陽剛中正居尊位然當屯之時陷于險中
六二雖為正應而陰柔才弱不足以濟初九為衆所
歸則人心已他屬坎體雖有膏潤而不得施故為屯
其膏之象以處小事則守正猶可獲吉以處大事則
雖正亦凶矣初與五皆陽而五以中居尊反遜于初
者初在下而動為衆所歸時之方來者也五在上而
陷于險人心他屬時之已去者也六爻獨二五言屯

者二在下而柔遇時之屯者也五在上以剛而陷于柔自屯者也守貞不字无濟變之才屯膏吝賞非大君之道皆不能濟屯者也

象曰屯其膏施未光也

光陽德也陷于二陰之間人君澤不下及所施未光大也

上六乘馬班如泣血漣如

坎為血卦又為水有泣血漣如之象陰柔无應處屯

之終進无所之唯有憂懼遂至于泣血漣如也爻言
乘馬班如者三二待五四待初皆有應獨上无所待
唯有泣血漣如而已

象曰泣血漣如何可長也

屯難窮極莫知所為顛沛如此何能久乎全卦當屯
難之世居上陷險而下方震動陽剛奮發而能下人
則可以為君柔順待求而應則可以為輔居上而澤
不下究則僅可小安居下而應遠被迫則但當守正

若貪欲妄行勢必取困窮極憂懼理難久長知此可
以處世變矣



蒙卦下坎上艮艮一陽止于二陰之上故其德為止
其象為山坎為水為險內既險陷不安外又行之不
可蒙之象也水必行之物遇山而止莫知所之亦蒙
之象蒙次于屯蓋屯者物之始生物生必蒙蒙者物
之穉蒙昧未明蒙所以次屯也乾坤之後屯主在震

之初九蒙主在坎之九二此長子代父長兄次第之象艮為少男方有待于開發者也此屯蒙次乾坤之義也又屯之建侯有君道焉蒙之養正有師道焉天地既位君師乃立此又乾坤屯蒙之序也六爻二陽四陰亦以陽爻為主然九二剛而得中故能為蒙之主上九過剛不中則但可擊蒙禦寇而已上下四陰爻皆因二以起義五應二則為童蒙之吉初承二則為發蒙之利四遠二不明則為困蒙之吝三乘二不

順則不以蒙待之故獨此爻不言蒙此六爻之大略也

蒙亨匪我求童蒙童蒙求我初筮告再三瀆瀆則不告利貞

物生之初蒙昧不明然蒙者不終于蒙則有亨道而卦之九二以剛居中與六五陰陽相應能發人之蒙亦有亨道也我指二童蒙幼穉而蒙昧謂五也禮无往教故非我往求童蒙必待童蒙之求我也其所以

必待童蒙之求我者何也凡求教者必其心精專而
吾之言易入故童蒙來求我則告之若再三則以我
求蒙為褻瀆瀆則雖告之无當與不告同矣凡若此
者蓋以蒙者為物所蔽其中之正未亡也俟其求發
而告之使歸于正所以利也若求蒙至再三褻瀆彼
終不得其正何利何亨之有乎本義以初筮再筮為
喻言初筮指問者之精專瀆指問者之煩瀆于理固
順但易皆取象不必作喻言觀象傳以剛中及瀆蒙

二語似非指問者言來註以初筮指二再三指三四說又近鑿今按蒙有九二之發蒙則不終于蒙有亨象二不求五而五求二有不求童蒙童蒙求我之象坎一陽為內卦初筮所得初筮告之象艮一陽止于上再三則不告之象九居二六居五似非正矣然二以剛中為正五以應二為正利貞之象

彖曰蒙山下有險險而止蒙

山下有險上峻而難升下險而莫測以卦象釋蒙之

義也內險則危殆不安外止則窒碍難往以卦德釋
蒙之義也

蒙亨以亨行時中也匪我求童蒙童蒙求我志應也初
筮告以剛中也再三瀆瀆則不告瀆蒙也蒙以養正聖
功也

此以卦之體釋卦辭也卦以九二當發蒙之任者以
亨行時中謂九二以可亨之道發人之蒙所行皆得
其時之中也時者當其可之謂五之志未與二應而

告之非時也再三而瀆亦非時也蒙當養正過此而後養亦非時也故下文皆言行時中之事二不求五而五求二志自相應也初筮得九二以剛居中故告之有節也瀆蒙則與不告同以蒙不可瀆也人皆學為聖人而聖學不外于養正人惟當蒙之時因時而告則有以養之使正即為作聖之功甚言蒙之不可不養而養之必以時乃亨也

象曰山下出泉蒙君子以果行育德

泉水之始出者出而遇險未有所之故有蒙象然泉之既出勢有必行君子體坎之剛中以果決其行水尚在山涵蓄深沉君子體艮之靜止以養育其德初六發蒙利用刑人用說桎梏以往吝

初六以陰居下蒙之甚也欲發其蒙利用刑人謂痛加懲責使知敬學也用說桎梏謂暫去拘束以待自新坎為刑為桎梏故有其象然坎初變為兌則為毀折又有脫之之象桎梏用之未刑刑時未有不脫桎

梏者若既刑又桎梏一往而不舍拘束太苦則失敷教在寬之義必致羞吝矣

象曰利用刑人以正法也

發蒙之初法不正則人玩故懲戒之以正教之之法蓋明刑以弼教也

九二包蒙吉納婦吉子克家

此一爻而具三象也包蒙對上下四陰言納婦克家皆對六五言九二以陽剛統治羣陰當發蒙之任然

物性不齊不可一概取必唯剛而得中故能有所包容而吉也坎中陽而五陰以陰應陽二能納之納婦之象也五位尊有父之象二居下位而能任上事又為子克家之象也時解謂大臣能敷教以寬以元負君之委任善教之良臣猶克家之肖子也亦通象曰子克家剛柔接也

程傳謂子而克治其家者父之信任專也二能主蒙之功者五之信任專也此重五之能接二也本義但

言指二五之應謂剛柔往來相接也二說本義為優
全卦不重在五也

六三勿用取女見金夫不有躬无攸利

三變為巽為長女有女象九二陽剛得乾金之中爻
有金夫象六而居三陰柔而不中正女之見有金之
夫而不有其躬以從之者也取女得如是之人何所
利乎故戒占者以勿取也王註謂三應在上有男女
之義三之動為女先求男故有此象不如大金合此

六二參觀而以三趨二取象為優蓋屯之六二近初九之陽而正應在五然震之性動而趨上而所居又中正故曰女子貞不字十年乃字蒙之六三近九二之陽而正應在上然坎之性陷而趨下而所居又不中正故曰見金夫不有躬六五中正故為可納之婦三不中正故為淫奔之女六四質柔雖困猶可教故得稱為蒙三狗欲趨利而忘身併不得言蒙矣故言勿用以拒之亦不屑之教也

象曰勿用取女行不順也

順亦作慎按程傳作邪僻不順亦可捨正應之夫而從金夫是不順也

六四困蒙吝

六四以陰居陰既遠于陽无正應又在二陰之間為困于蒙之象蓋氣質既昏錮蔽又甚可羞吝之甚也然能尊師取友困而學之猶或可免終焉則真吝矣象曰困蒙之吝獨遠實也

陽實陰虛唯剛明有實德者能發蒙四獨遠之欲從九二則隔三欲從上九則隔五又乏正應異于初與五也言獨使反而知恥也

六五童蒙吉

艮為少男有童象所謂童蒙者不失赤子之心純一未發以聽于人非幼稚之謂也五以柔中居尊下應九二所謂童蒙求我有可亨之道者故吉時解作幼主任賢亦近之勿拘

象曰童蒙之吉順以巽也

中爻為坤順變則為巽順以爻之柔言之舍己從人順也巽以志之應言之降志下求巽也

上九擊蒙不利為寇利禦寇

艮為手有擊之象以剛居上治蒙過剛有擊蒙之象艮止于上不利為寇之象應爻坎為盜賊利禦寇之象本義取必太過攻治太深則必反為之害是猶為寇者矣故不利惟捍其外誘以全其真純則雖過于

嚴密乃為得宜猶禦寇者也故利全卦取象以誨人
言程傳以用兵言唯本義謂凡事皆然不止為誨人
也得周易立象以盡意之旨占者隨事以思其義可
也今以此爻合之彖辭卦中二陽爻二初筮之告者
也上之擊蒙近于再三之瀆者也敷教在寬非徒取
于擊者然如三之縱欲忘身猶之寇也擊之禦寇之
道若一概施之他爻則瀆是上自為寇矣又何利乎
禦寇貞也為寇則非貞矣如此解則與彖意更相發

明

象曰利用禦寇上下順也

上陽爻擊蒙者下四陰皆蒙也上之剛不為暴上之順也下得擊去其蒙下之順也全卦有作師之道大抵正蒙者貴有剛中之德而有所包容不必過暴以為之害此二之包蒙所以吉而上之擊蒙但利于禦寇不宜瀆而至于為寇也為蒙者貴于柔順中正以聽于人不宜自遠于剛明之德尤不可縱欲以忌其

身此童蒙所以吉困蒙所以吝而見金夫不有躬者
併不得數于蒙也初亦陰爻宜言蒙而言發蒙之道
宜痛懲而暫舍者蓋亦因其材質之陰柔卑下故正
蒙之道宜如此若能為五之童蒙則刑可不用矣六
爻于正蒙之道最為明白詳盡然而聖人立象以盡
意不必專為一事而言凡治己教人一切應事接物
皆可推其意而悟之也



需卦下乾上坎以卦象言水在天上未遽下地必待陰陽之交薰蒸而後成雨需之象也以卦德言乾健坎險以剛遇險而不遽進以陷于險需之義也需次于蒙按序卦蒙物之穉也物穉不可不養也故受之以需需者飲食之道也物之幼穉必需飲食長養雲上于天有蒸潤之象飲食所以潤益萬物故需為飲食之道所以次蒙也卦之大意取須待之義序卦取所需之大者耳按左傳云需事之賊言猶豫不決之

害事也。易需非不決之謂。見險而不動。能動而不輕動者也。內三爻以見險不輕進為需。外三爻以入險而待人以共進為需。六爻初九九五之吉不待言。餘四爻雖有悔吝。終歸于吉。如二曰終吉。三曰敬慎不敗。蓋有剛健之德而能相機度勢。從容少待。鮮有敗者。四曰順以聽上曰敬之終吉。蓋雖入險中而待陽剛之德以共進。故亦吉也。卦雖四陽二陰。然三陽不輕進。坎五居尊有孚二陰非卦義所重。故不得為

卦之主

需有孚光亨貞吉利涉大川

需坎水在前乾健臨之將涉水而不輕進之象乃事
所當待非不當待而待者也九五坎體中實陽剛中
正而居尊位為有孚得正之象三四互為離光明
之象坎為通亨通之象乾濟乎坎有涉大川之象乾
陽在下皆有所需九五坎陽在上又為衆所需需之
道貴于實心又貴于得正人之需有出于不得已者

需而无實无光而且亨之時必實有有守能待之心
則无私計較而光明不卹得失而亨通矣然世有心雖
誠實而處事未正者需而非正无吉而且利之理必
所為皆合于義不圖行險僥倖則居常凡事皆吉而
濟險歷難亦利矣蓋有孚以善其需貞又所以善其
孚孚貞者盡所需之道光亨吉利則得所需之效也
彖曰需須也險在前也剛健而不陷其義不困窮矣

需者須也理勢所在不得不待也剛健者多以輕躁

而陷于險剛健而能不陷故善其不至困窮也坎陷而云不陷何也需然後進所以不陷不陷則終能出險故不困窮乾三陽進而迫乎險遇險而能需者也坎一陽居中守正處險而能需者也遇險而能需則不至犯險處險而能需則又將出險矣故曰不陷此以卦德釋卦名義也

需有孚光亨貞吉位乎天位以正中也利涉大川往有功也

正中與中正同指五也正則規模宏遠無欲速之為
中則中心寧靜无喜功之念唯以中正居天位故雖
險在前而終必克濟非若蹇之見險而止雖坎居上
而剛健不陷非若困之剛揜人知奮發者能有功不
知以剛健之德能臨事而懼從容整暇氣定神全不
往則已往必有功此以卦象釋卦辭也

象曰雲上于天需君子以飲食宴樂

雲氣上蒸于天必待陰陽之和而自成雨无所作為

也事之當需者亦然內有孚外守正但飲食宴樂俟其自至飲食以養其氣體宴樂以和其心志所謂居易以俟命非若後世麴蘖之托昏冥之逃者也

初九需于郊利用恒无咎

郊曠遠之地用恒守其常也初遠于險有需郊之象而九陽剛居陽位有恒于其所之象同人于門于宗而後于郊自近而遠也需由郊而沙而泥自遠而近也既能需于郊又戒以利用恒者人需于始或不能

需于終唯以義命自安身既遠險又心不妄動乃无咎也

象曰需于郊不犯難行也利用恒无咎未失常也

險難由人自犯于郊則不冒險而行矣恒即象之孚也貞也貞者乾之常利用恒未失處需之常道也

九二需于沙小有言終吉

水近則有沙二近險有需于沙之象二三四互得兌為口舌有言語相傷之象剛中能需有終吉之象既

近于險雖未陷患害羣小從而訾議之然言語之傷
災之小者初以剛居剛雖遠于陷猶有戒辭二以剛
居柔守中寬裕故雖近險可斷其終之吉也爰多以
相應為吉此又不然者見險在前有待而進故无取
于相應也

象曰需于沙衍在中也雖小有言以吉終也

衍寬也以寬居中不急于進蓋剛居柔位故謂剛為
衍也

九三需于泥致寇至

水涯有泥三將陷于險有需于泥之象坎為盜賊有寇之象三過剛不中有自我致寇之象

象曰需于泥災在外也自我致寇敬慎不敗也

外謂坎在外卦謂之外則禍不自己作但以過剛妄動以近于險則寇乃我致之也然卦為需能敬慎猶可不至于敗此則象中本无此意本義所謂發明占外之占使人之逼近于險者思所以善處之道也

六四需于血出自穴

內卦三陽以見險不輕進為需外卦入險矣以待人
共進為需血者殺傷之地穴者險陷之所四入乎險
坎為血卦故有需于血之象然以陰居柔得正初為
正應所居得正又待正應之陽剛為援可以不終陷
于穴矣故有出自穴之象

象曰需于血順以聽也

陰柔入險中疑不能出矣然能順以聽初之陽剛則

不冒險以進是以能出穴也三能敬則雖迫坎之險而不敗四能順則雖陷坎之險而得出敬與順固處險之道也

九五需于酒食貞吉

坎有酒食之象九五為需之主以一陽處二陰之間以待三陽同德之援需于酒食之象居中得正三陽自來陽彙進而陰退則坎可平而險可夷貞吉之象人君位乎中正之天位與天下相安于日用飲食之

常无為而治者也然又必正乃吉非可宴酣无度也
飲食男女人之大欲存焉屯蒙多言男女需言飲食
蓋雲上于天物資雨澤以為養需于酒食人亦藉飲
食以為養故也

象曰酒食貞吉以中正也

五居中得正是以貞則吉也

上六入于穴有不速之客三人來敬之終吉

六居上陰居險極无所復需變巽為入有入穴之象

下應九三而三下二陽連類並進有不速客三人來之象居柔得正以待陽剛變巽亦為順有敬之之象然陰動于上三陽至健知險可以拯溺待以共濟亦將出險矣故有終吉之象

象曰不速之客來敬之終吉雖不當位未大失也

六居上陰之當位者曰不當位以應爻言三與上正應當位者也今三陽同來而敬之非其位似有失矣然入穴之時三陽能援我猶論位之當否而敬之失

權變矣故初二雖不當位亦敬以待之以出險則亦未大失也全卦以遇險不遽進為義內卦乾健知險有所須而不輕進外卦坎險待剛健之材以共濟險九五孚貞需之適當其時其他或近或遠要于須而不輕進需于泥已迫險矣然能敬猶不至敗入穴已陷險矣然能敬猶可終吉敬者處險之學敬則无不貞无不孚矣此象傳又發象外之旨也



訟卦下坎上乾以二象言之天陽上行水性就下其
行相違以二體言之上剛陵下下險伺上剛險相接
又以一人言內險而外健以二人言此險而彼健所
以訟也訟卦次需按序卦飲食必有訟故受之以訟
人所須者飲食既有所須訟端以起訟所以次需也
六爻不外象傳訟不可成一言九五居尊中正為聽
訟之主故吉餘五爻皆訟者大抵剛者能訟柔者不
能訟初與三柔故皆終吉二四上皆剛而二與五對

顧勢不敵四與初對知理不可亦以居柔故得无眚
而安貞也獨上處卦之窮三柔不敵故雖暫勝而不
足敬此全卦六爻之大旨也

訟有孚窒惕中吉終凶利見大人不利涉大川

天水違行乾剛在上以制下坎險在下以伺上又為
內險外健已險彼健皆訟之象九二中實而沉二陰
之中上无應與有有孚而見窒之象坎卦為加憂剛
居二在下卦之中為惕而得中之象上九過剛有終

極其訟之象九五剛健中正有大人之象三陽在坎
上以剛乘險以實履陷有不利涉大川之象蓋訟非
得已必理直受誣有孚見窒而後可又必憂惕存心
適中即止不可終極其訟以取凶又利見中正之大
人以取直不可冒險以求勝聖人欲人无訟故不言
元亨貞言吉兼言凶言利即言不利蓋至于訟必无
全吉所以貴謀始以絕訟端也此卦與需反對與需
卦皆言有孚以中實皆同也但坎在上則為光亨坎

在下則為窒惕乾在坎下剛健不陷故利涉大川乾
在坎上為健无所施故涉川不利

彖曰訟上剛下險險而健訟

此以卦德釋卦名義

訟有孚窒惕中吉剛來而得中也終凶訟不可成也利
見大人尚中正也不利涉大川入于淵也

剛來得中按本義以卦變言易言卦變者始于此自
上而反下為來自下而升上為往為進此自遯卦艮

體九三來而居二在下卦之中也今按卦變之說本
于虞翻先儒亦多異同義多牽強今俱以綜卦論之
需訟相綜需上之坎來居下卦坎中剛居柔位剛中為有
孚與五敵而不相應為窒窒塞而坎體常懷惕懼之
心不過于訟為吉皆以剛來而得中也得中則吉終之則
凶故以不可成戒之此皆以綜卦言也二得中五居
中得正中則其心不偏正則所斷合理窒者可伸矣
此以卦體言之也以乾剛臨坎水之上欲訟以陷人

反自陷于淵此以卦象言也

象曰天與水違行訟君子以作事謀始

天上水下相背而行所以致訟違而後謀則无及矣
欲絕訟端必謀之于始天為三才之始水為五行之
始君子法之以謀始又乾陽生于坎水坎水生于天
一乾坎始本同氣其後至于違行有天淵之隔故其
幾之萌不可不謹

初六不永所事小有言終吉

好訟者多剛初六質柔不能與人訟者故有不永所
事之象然不曰不永所訟而曰所事者訟端初起猶冀
其不成訟也初變為兌有小有言之象此小有言與
需不同需二在人有言語之傷此則在我有爭辨之
語也有事不永則易收有言而小則易釋所以終吉
以其質柔在下故也

象曰不永所事訟不可長也雖小有言其辨明也

訟不可成長則成矣不可長不欲其成也小有言語

因辨得明所以終吉也

九二不克訟歸而逋其邑人三百户无眚

九二陽剛為險之主本欲訟者然以剛居柔得下之中而九五陽剛居尊勢不可敵故有不克訟之象坎為隱伏有逃之象坤為國土二變坤有邑象二三四互為離離數三三百户之象坎為眚二變坤无眚之象歸而逋二句本義謂自處卑約以免災患蓋邑過三百非為竄也竄而據強災未免也退處卑小故得

无眚按此二句王註本義皆同而于邑人句終覺牽強今按蘇氏作一句讀逋其邑人三百戶者猶曰亡其邑人三百戶云爾失衆知懼猶可少安故曰无眚蓋以下訟上而不勝故其私邑之人亦懼而逋逃也然居柔知儆災眚或可免耳此說較順

象曰不克訟歸逋竄也自下訟上患至掇也

掇拾取也以下訟上則禍患自取邑人之逋自掇之患也

六三食舊德貞厲終吉或從王事无成

食舊德如祖宗有世德子孫得食其報之類六三本陰也變而為陽則陰柔為舊德矣然守其陰柔不欲爭訟故有食舊德之象不改其素為貞然所居剛位故有貞厲之象守舊居剛雖見侵凌終不罹禍有終吉之象然三雖不欲訟而與上應上九方剛其勢必訟故有或從王事之象此與坤從王事无成有終不同從王事即訟事也上位高將訟之于天子也无與

毋同作戒辭訟不可成即不得已而或至于從王之
事亦守舊以待无使訟之成也六爻獨三與上辭无
訟字然三主于讓上主于爭或從王事不得已而訟
者也錫之鞶帶則由訟而得者也此爻程傳本義蘇
氏來註所解各不同注疏雖對上九一爻言之而意
未盡姑出臆見以待就正

象曰食舊德從上吉也

守其柔貞以從上九故得吉也此亦與本義不同

九四不克訟復即命渝安貞吉

即就也命正理也渝變也九四剛而不中故有訟象
以其居柔故又為不克而復就正理能變易其心以
安于正之象占者如是則吉也二與五訟四與初訟
而皆曰不克者二四皆以剛居柔也然二以下訟上
不克者勢也四以上訟下不克者理也九二坎體其
心本險見勢之不敵而逃无眚而已九四乾體其性
至健知理之不可而渝故遂可獲吉聖人不責人以

无過而望人改過欲人審勢尤欲人知命也如此
象曰復即命渝安貞不失也

始不免于有失能改則不失矣

九五訟元吉

陽剛中正以居尊位聽訟而得其平者也占者遇之
孚窒者可伸矣故為大善之吉也然聖人貴无訟乃
以元吉與五何也蓋上有中正聽訟之君下乃有元
訟之化初之不永三之无成二四不克即上亦終褫

以有五之中正故也故曰利見大人也朱子謂刑獄之官皆足以當之不必專言人君然五實君位大抵必有德位之大人耳

象曰訟元吉以中正也

中則聽不偏正則斷合理謂以九居五也

上九或錫之鞶帶終朝三褫之

鞶帶命服之飾褫奪也乾為衣為園有帶象上以剛居訟極三柔而不抗故能勝之有錫命受服之象曰

或者亦未必然之辭也變兌為毀折過剛不中以訟得之豈能安久故又有終朝三褫之象蓋好訟不已以无理而取勝其所得終亦必失也

象曰以訟受服亦不足敬也

受服尚不足敬況三褫隨之乎甚言以愧之也全卦以九五為聽訟之大人餘皆訟者聽訟者欲其有中
正之德化天下于无訟訟者欲其有孚惕之心不可
成其訟初三質柔而不欲成訟四知理而不欲成訟

所以皆吉二知勢而不敢成訟所以无眚獨上終訟故雖訟而不足敬也



師卦下坎上坤二體為地中有水聚衆之象二卦之義內險外順險道而以順行有師之義六爻以一陽統衆陰有大將率師之象二剛居下五柔居上任之人君命將出師之象故名為師師次于訟按序卦訟必有衆起故受之以師師旅之興由于有爭所以次

訟也出師貴乎得正而用將在乎得人此全象之大
旨也九二以陽剛在下卦之中為老成之將六五相
應為任將之君三四亦皆將兵之臣二以居中持重
而吉三以躁妄而凶四以柔自守僅可无咎初為出
師之始貴其紀律之明上為行師之終尤欲論功行
賞之當蓋六爻而行師之道備矣又師與比反對皆
以一陽統衆陰而義各有所取蓋先王之制民居則
為比閭族黨故比則衆在內而一陽在上為之主君

象也行則為伍兩卒旅故師則衆在外而一陽在下為之統將帥象也此又二卦取義之意也

師貞丈人吉无咎

師兵衆也下坎上坤以卦象言地中水聚猶師之聚以卦德言坎險坤順古者寓兵于農伏至險于大順藏不測于至靜之中卦唯九二一陽在下卦之中為將之象上下五陰從之為衆之象又九二以剛在下統衆六五以柔在上而應之為人君命將出師之象

貞正也所謂仁義之師師出有名者也丈人老成持
重衆所畏服者也言行師之道當以貞為本而用將
又必得老成持重之人乃有全師戰勝之吉无窮兵
黷武之咎言吉而又曰无咎者蓋動衆而无功罪也
有功而貽患亦非善也故必吉乃无咎而吉又貴于
无咎也

彖曰師衆也貞正也能以衆正可以王矣

此以卦體釋師貞之義以能左右之也坎以一陽而

能統上下五陰皆歸於正道則順天應人可以為王者之師矣以之正則為王微有不正則為霸行一不義殺一不辜而得天下不為所謂以衆正而為王者之師也

剛中而應行險而順以此毒天下而民從之吉又何咎矣

以卦體言之九二剛中而六五應之剛而得中恩威並濟五與為應則君之信任專矣以卦德言之坎險

坤順雖行危道而順人心以此興師雖勞民傷財不
无毒于天下而民悅而從則有吉而无咎矣此釋丈
人吉无咎之義也

象曰地中有水師君子以容民畜衆

地中有水有包容畜聚之象古者兵出于民容保其
民即以畜聚其衆水不外于地兵不外于民也容民
則无流民畜衆則无叛衆容之畜之于無事之時而
用之于有事之日

初六師出以律否臧凶

律即紀律否臧謂不善即无紀律之謂也初出師之始出師之道當謹于始以律則吉不善則凶蓋以初六才柔故有否臧之戒然以律不言吉否臧則凶者律令謹嚴出師之常勝負猶未可知若失律則凶立見矣

象曰師出以律失律凶也

按程傳釋臧為勝謂失律雖勝亦凶也今按象傳似

竟以否臧為失律為是

九二在師中吉无咎王三錫命

九二以剛居柔在下卦之中有在師中吉无咎之象
上應六五之柔為君所寵任者也有王三錫命之象
在師中吉无咎竟作在師而得中不必又云在師之
中蓋剛柔兼濟故有克敵全師之吉无躁妄逗撓之
咎此即象之所謂丈人也錫命至于三言極其寵故
權无中制所向得有功也

象曰在師中吉承天寵也王三錫命懷萬邦也

爻就二之剛中得吉兼由上之寵任言象傳專重人君任將之道言言二之中而得吉以承天之寵故也人君三錫命于將亦非徒私于一將也蓋將以綏懷萬邦必專其事權以責其成功也

六三師或輿尸凶

六三衆陰在上有積尸之象坤為輿坎為輪有輿尸象六三以陰居陽不中不正才弱志剛輕躁以進師

徒覆敗輿尸以歸也此按本義如此又按程傳蘇傳皆以輿為衆尸主也小人掣肘號令不一必至敗也今觀下文弟子輿尸則程蘇之說為順

象曰師或輿尸大无功也

本欲躁妄以圖功而至于大无功非徒小挫而已

六四師左次无咎

軍尚右左次退舍也陰柔不中而居陰得正故有左次之象全師以退賢于六三故无咎

象曰左次无咎未失常也

恐人以退為怯故云知難而退師之常也

六五田有禽利執言无咎長子帥師弟子輿尸貞凶

六五用師之主柔順而中不為兵端者也然敵加于已不得已而應之應坎為豕為田中有禽害稼之象言語辭利于搏執之无窮黷之咎也長子九二也弟子三四也長子即丈人自衆尊之曰丈人自爻象之曰長子二互三四為震長子之象五獨與二為應故

有使長子帥師之象又因以戒之言任將在審且專
設若任君子而使小人參則使之與尸以歸出師之
名義雖正不免覆敗之辱矣此象既言貞而又言必
用丈人乃吉之意也按本義弟子與尸句其解如此
未免弟子下費一轉折不如程蘇二傳任長子而使
衆弟子參之雖正亦凶于文義尤順也

象曰長子帥師以中行也弟子與尸使不當也

長子所以可帥師者以剛中之德行之也弟子非不

可使使叅長子之權則不當矣衆之死生國之存亡
在君之使可不審哉

上六大君有命開國承家小人勿用

上師之終論功行賞之時坤為土有開國承家之象
陽大陰小陰爻重疊小人之象變艮為止勿用之象
按本義小人雖有功不可使有國土但優以金帛可
也蓋以兵多詭道立功不必皆君子故小人之賞雖
不可无而用之使有國有家則不可此說雖順然論

功封爵土必无但賞以金帛之理不如來註以用為
任之以政事為是蓋小人功大開國功小承家使之
享有爵土不必任以政事如光武雲臺之將鄧禹賈
復外不任以政是也

象曰大君有命以正功也小人勿用必亂邦也

論功行賞以正其功君子小人皆在所錄也但用之
使豫國家之事則邦必亂矣出師本以綏懷萬邦豈
復容小人亂之哉錫命于行師之始專在丈人有命

于行師之終戒在小人用將不可不知人也全卦于用師之道最為詳盡王者之師在于得正尤貴于擇人專任君子而不以小人叅之此人君御將之道也行師者貴有剛中之德而又得君之委任師之出必紀律嚴明而後可以制勝其或敵強我弱則當知難而退寧為四之左次勿為三之與尸此為將之道也至于論功行賞則有開國承家茅土之封而小人必不可豫家國之事此聖人之垂戒深遠非若後世權

謀苟且之事凡命將出師之道盡于斯矣



周易淺述卷一